

Departamento di Cultura Aruba ta firma MOU pa Aruba su di 60 celebracion di carnaval



ORANJESTAD (AAN): Diahuebs mainta Minister di Turismo, Transporte, Sector Primario y Cultura Sr. Otmar Oduber conhuntamente cu Departamento di Cultura Aruba (DCA) representa pa Director interino Sr. Frank Croes, ATA representa pa su CEO Sra. Ronella Tjin Asjoe-Croes, Organisacion Musica representa pa Sr. Hilward Croes y pa Fundacion di Aruba su Carnaval (SAC), Sra. Tecla Kelly a firma dos Memorandum of Understanding (MUO) na beneficio di e di 60 edicion di Aruba su Carnaval. Esaki ta

solamente e inicio di plannan grandi cu tin pa cultura di Aruba y Carnaval.

Sr. Frank Croes, Director interino di DCA ta indica cu ta un satisfaccion enorme pa forma parti di un colaboracion cu a inicia e aña aki. A base di e vision y maneho cu Minister Otmar Oduber ta stipulando pa loke ta trata desaroyo cultural aki na Aruba. Carnaval y cultura di Aruba ta forma parti di e momento historico aki.

DCA a clausura aña riba e bon caminda y ta indica di ta mucho mas activo y envolvi pa cu actividadnan cultural.



Ya caba DCA tabata presente durante e festival di Dande na clausura di aña 2013, brindando e celebracion grandi aki mas atencion.

Awor a yega e turno pa DCA brinda tur su atencion na e celebracion grandi di e 60 aniversario di Carnaval. Mirando e hecho cu Musica y Carnaval ta forma un parti integral di otro, ta haci e momento di firma di MOU hopi mas na su lugar.

E colaboracion cu tabata existi antes entre DCA y organisacionnan tabata completamente otro y cu e entendimento nobo aki firma conhuntamente cu Ministerio di Turismo, Transporte, Sector Primario y Cultura, ATA, DCA, SAC y Organisacion Musica ta crea e posibilidad pa traha hunto na un manera mucho mas structura cu ta contribui na garantiza e continuacion

y desaroyo di Carnaval y ambos actividad. Mirando cu Carnaval ta un parti esencial pa promove nos turismo ta hopi importante pa por traha hopi mas structura.

Tambe Sr. Frank Croes a indica cu mirando cu e aña aki Aruba ta celebra su di 60 aniversario di Carnaval, DCA lo documenta esaki pa por crea un curriculum pa e sistema di educacion basa riba nos cultura pa inculca esaki ya di chikito caba den nos futuro generacion. Ademas ta hopi importante pa por tin archivonan cu informacion cultural documenta, mas aun cu carnaval ta e celebracion mas grandi den cultura di Aruba. Esaki ta sigur hopi importante pa conserva nos cultura, historia y tradicion.

DCA a gradici Minister Otmar Oduber y ATA pa acerca DCA pa por forma parti di e desaroyo nobo akli, cu sigur lo sa di duna su frutonan y cu ta garantia pa engrandece nos Carnaval, Sr. Croes di DCA ta bisa:

“E desaroyo nobo aki lo contribui na un celebracion digno y sano di Aruba su Carnaval.”